



## ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

### ԴԱՏԱԿԱՆ ԿԱԶՄԻ ՈՐՈՇՈՒՄ

#### ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ

Քաղ. Երևան

14 ապրիլի 2021 թ.

Սահմանադրական դատարանի դատական կազմը՝

Նախագահությամբ՝ Ա. Վաղարշյանի

Անդամակցությամբ՝ Է. Շաթիրյանի

Վ. Գրիգորյանի

Քննության առնելով Ռոբերտ Օրբեյանի անհատական դիմումի ընդունելիության հարցը,

#### Պ Ա Ր Զ Ե Ց .

1. Ռոբերտ Օրբեյանը դիմել է Սահմանադրական դատարան (դիմումը Սահմանադրական դատարան է մուտքագրվել 2021 թվականի ապրիլի 5-ին)՝ խնդրելով.

«Հրապարակային սակարկությունների մասին» ՀՀ օրենքի 34-րդ հոդվածի դրույթը համարել հակասող ՀՀ Սահմանադրության 10, 28, 61, 63, 73-րդ հոդվածներին և ճանաչել անվավեր»:

2. Դիմողի կարծիքով «Հրապարակային սակարկությունների մասին» ՀՀ օրենքի 34-րդ հոդվածը, որը կարգավորում է հարկադիր աճուրդը չկայացած հայտարարելու և անվավեր ճանաչելու հետ կապված հարաբերությունները, հակասում է Սահմանա-

դրության 61 և 63-րդ հոդվածներին, քանի որ այն չի ապահովում անձի իրավունքների և ազատությունների դատական, ինչպես նաև պետական այլ մարմինների առջև իրավական պաշտպանության արդյունավետ միջոցների իրավունքը:

Դիմողը գտնում է, որ իր կողմից ներկայացված բողոքը վերաքննիչ դատարանի կողմից մերժվել է բացառապես այն պատճառով, որ գործով առկա չէ որևէ ապացույց այն մասին, որ ՀՀ, ք. Երևան, Շենգավիթ վարչական շրջան, Շիրակի փողոց թիվ 96 հասցեում գտնվող անշարժ գույքի աճուրդը կամ գրավի և երաշխավորության պայմանագրերը դատարանի վճռով ճանաչված են անվավեր:

Դիմողը նշում է, որ «հակասահմանադրական օրենքի համաձայն՝ ինքը պետք է վիճարկի աճուրդի արդյունքների մասին 11.08.2017 թ. թիվ 02 գոյություն չունեցող արձանագրությունը», սակայն ապացուցված է, որ «թիվ ԵԿԴ/0104/04/16 սնանկության գործում այդպիսի արձանագրություն գոյություն չունի»:

Դիմողի համոզմամբ ստորադաս դատարանը խախտել է նյութական իրավունքի նորմերը, քանի որ հայցը մերժելու համար կիրառել է «Հրապարակային սակարկությունների մասին» ՀՀ օրենքի 34-րդ հոդվածի դրույթը, որը չպետք է կիրառեր, և չի կիրառել Քաղաքացիական օրենսգրքի 304-րդ, 312-րդ, 313-րդ, 467-րդ հոդվածների դրույթները, որոնք պետք է կիրառեր:

**3.** Դիմումի և կից ներկայացված դատական ակտերի ուսումնասիրության արդյունքում Սահմանադրական դատարանի դատական կազմը գտնում է, որ սույն անհատական դիմումով գործի քննությունը ենթակա է մերժման այն պատճառաբանությամբ, որ վիճարկվող իրավական ակտի դրույթը դիմողի նկատմամբ չի կիրառվել: Այսպես.

Երևան քաղաքի առաջին ատյանի ընդհանուր իրավասության դատարանը, 01.11.2019 թ. կայացնելով դիմողի կողմից ներկայացված՝ գործարքն անվավեր ճանաչելու պահանջը մերժելու մասին վճիռ, նշել է, որ Քաղաքացիական օրենսգրքի 302-րդ հոդվածը նախատեսում է օրենքի խախտմամբ կնքված գործարքը, իսկ «Հրապարակային սակարկությունների մասին» ՀՀ օրենքի 34-րդ հոդվածը՝ օրենքի խախտմամբ կատարված հարկադիր աճուրդը շահագրգիռ անձի դիմումով՝ դատարանի

կողմից անվավեր ճանաչելու հնարավորություն: Դատարանը նշել է, որ գործով առկա չէ որևէ ապացույց այն մասին, որ ՀՀ, ք. Երևան, Շենգավիթ վարչական շրջան, Շիրակի փողոց թիվ 96 հասցեում գտնվող անշարժ գույքի աճուրդը կամ գրավի և երաշխավորության պայմանագրերը դատարանի վճռով ճանաչված են անվավեր, իսկ սույն գործով ևս հայցվորի կողմից չի ներկայացվել դրանք վիճարկելու պահանջ:

Իր հերթին, վերաքննիչ դատարանը, վկայակոչելով «Հրապարակային սակարկությունների մասին» ՀՀ օրենքի 34-րդ հոդվածը, նշել է, որ այն նախատեսում է օրենքի խախտմամբ կատարված հարկադիր աճուրդը շահագրգիռ անձի դիմումով՝ դատարանի կողմից անվավեր ճանաչելու հնարավորությունը, և որ տվյալ դեպքում «Ավտովեգ» ԲԲԸ-ն և Ռոբերտ Օրբեյանը թեև պահանջել են անվավեր ճանաչել 29.08.2017 թ. կնքված անշարժ գույքի առուվաճառքի պայմանագիրը, սակայն ներկայացրել են սնանկության վարույթի շրջանակներում աճուրդի անվավերությանը վերաբերող փաստարկներ: Վերաքննիչ դատարանը նույնպես եկել է այն եզրահանգման, որ գործարքի անվավերության նկատմամբ կիրառելի են Քաղաքացիական օրենսգրքի իրավադրույթները, այնինչ «Հրապարակային սակարկությունների մասին» ՀՀ օրենքի 34-րդ հոդվածը նախատեսում է աճուրդի անվավերության կարգը:

Այսինքն՝ «Հրապարակային սակարկությունների մասին» ՀՀ օրենքի 34-րդ հոդվածի վկայակոչումը թե՛ առաջին ատյանի դատարանի, թե՛ վերաքննիչ դատարանի կողմից նպատակ է հետապնդել ցույց տալ այդ դրույթի կարգավորման առարկան, մասնավորապես այն, որ վիճարկվող նորմով նախատեսվում է աճուրդի անվավերության կարգը, մինչդեռ գործարքի անվավերության նկատմամբ կիրառելի են Քաղաքացիական օրենսգրքի իրավադրույթները:

Այս պայմաններում դիմողի նկատմամբ դատարանները կիրառել են այլ իրավաճորմեր, հետևաբար, առաջին ատյանի դատարանի, այնուհետև՝ վերաքննիչ դատարանի կողմից՝ սույն գործով վիճարկվող «Հրապարակային սակարկությունների մասին» ՀՀ օրենքի 34-րդ հոդվածի վկայակոչումը տվյալ դեպքում չի կարող համարվել կիրառում, քանի որ դիմողի համար չի առաջացրել իրավական հետևանքներ:

Սահմանադրական դատարանը, իր 04.04.2008 թ. ՍԴՌ-747 որոշման մեջ անդրադառնալով օրենքի դրույթի կիրառմանը, արտահայտել է հետևյալ իրավական

դիրքորոշումը. «... «կիրառում» հասկացությունը չի վերաբերում դատական ակտերում օրենքի այս կամ այն դրույթի ցանկացած վկայակոչման: Միայն այն պարագայում դա կարող է դիտարկվել որպես օրենքի դրույթի «կիրառում», երբ անձի համար այն առաջացնում է իրավական հետևանքներ: Բոլոր այն դեպքերում, երբ վկայակոչումն ունի ծանուցողական բնույթ կամ դրա միջոցով դատավարության կողմի ուշադրությունն է հրավիրվում իր գործողությունների օրինականության վրա, հարցի սահմանադրականության բարձրացման տեսանկյունից չի կարող դիտարկվել որպես օրենքի դրույթի «կիրառում»:

Սահմանադրական դատարանն իր՝ 2009 թ. մարտի 17-ի ՍԴԱՌ-21 աշխատակարգային որոշմամբ արձանագրել է. «... «Սահմանադրական դատարանի մասին» ՀՀ օրենքի 69 հոդվածի 1-ին մասում նշված որևէ պայմանի բացակայության դեպքում անհատական դիմում ներկայացրած ֆիզիկական կամ իրավաբանական անձը սահմանադրական դատարան դիմելու համար իրավասու սուբյեկտ չէ»:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 2-րդ կետով և 69-րդ հոդվածի 1-ին մասով՝ Սահմանադրական դատարանի դատական կազմը

### Ո Ր Ո Շ Ե Ց .

Ռեբերտ Օրբելյանի անհատական դիմումով գործի քննությունը մերժել:

Նախագահող՝  
Անդամներ՝



Ա. Վաղարշյան  
Է. Շաթիրյան  
Վ. Գրիգորյան

14 ապրիլի 2021 թվականի  
ՍԴԴԿՌ-25